

東華續錄

光緒六十六

臣朱壽朋敬編

臣張毓英恭校

冬十月壬申朔時享 太廟遣隆懃恭代行禮○諭山東連年水災小民蕩析離居朝廷實深軫念前經

諭令陳士杰截留新漕十萬石以備冬賑災黎待哺嗷嗷刻不容緩著該撫督飭地方官及委員等速將冬賑早日散放核實辦理並將明年春賑提前趕辦以全民命而卹災區○諭戶部等部會奏議覆劉錦棠奏統籌新疆全局一摺前據劉錦棠奏遵議新疆兵數餉數一切事宜當經諭令該部議奏茲據會議覆陳新疆底定有年綏邊輯民事關重大允宜統籌全局釐定新章戶部前奏以定額餉定兵數一事權三端爲要圖劉錦棠所議留兵改營設官屯田四條與該部所奏用意相同卽著次第舉行以垂久遠前經左宗棠創議改立行省分設郡縣業據劉錦棠詳晰陳奏由部奏准允設道廳州縣等官現在更定官制將南北兩路辦事大臣等缺裁撤自應另設地方大員以資統轄著照所議添設甘肅新疆巡撫布政使各一員其應裁之辦事幫辦領隊參贊各大臣及烏魯木齊都統等缺除未經簡放有人外所有實缺及署任各員著俟新設巡撫布政使到任後再行交卸候旨簡用至伊犁參贊大臣一缺塔爾巴哈臺領

隊大臣二缺應裁應留著劉錦棠等酌定具奏新疆旗綠各營兵數及關內外餉數均照議核實經理國家度支有常不容稍涉耗費劉錦棠務當與金順等挑留精銳簡練軍實並隨時稽察餉項如將領中有侵冒情事卽著據實奏參從重治罪餘著照所議分別辦理如有未盡事宜仍著劉錦棠妥爲籌畫陸續陳奏再由該部詳核定議另片奏會議金順譚鍾麟所奏兵餉各節著依議行○諭前據給事中葉蔭昉奏參河南巡撫鹿傳霖貪劣欺飾各節當經諭令孫毓汶烏拉布馳往查辦茲據查明覆奏鹿傳霖被參教匪滋事募勇自衛屬員諱匿竊劫各案概行免參人命案件並不提審平以鬪殺擬結信任幕友與該撫姪攬權納賄頹唐衰老罕見僚屬等欸或查無其事或傳聞不實卽著毋庸置議至鶯粟收稅查報易滋弊端著該撫申明例禁將加稅卽行停止其疏濬溝渠一事地勢高下不同豈能一律稱便除業經挑挖工竣外其餘均著停止河南盜風素熾近日劫案尤多該撫務當慎選牧令綏輯地方認真緝捕並令各營妥籌扼紮實力協拿總期有犯必獲以靖奸宄鹿傳霖自任河南巡撫以來辦事尙屬認真亦能不避嫌怨惟於應興應革所定新章間有窒礙之處雖係因公起見究屬措置未盡合宜鹿傳霖著交部議處○諭前據翰林院代遞編修孔祥霖奏東河歲修銀兩由道支領迫發交各廳有前五成後五成名目霜降後官幕各有分潤謂之霜酬又有河夫銀一欸近年工用從不需此等語當諭令孫毓汶烏拉布確

切詳查茲據將歷年領款情形查明覆奏並酌議提存撙節數目著照所請自明年爲始將歲修減成等項銀兩均存司庫冬間截數奏明請旨候撥嗣後作爲定章如核減之數逐歲增多將督辦承辦之道廳奏請獎敘倘有不肖河員徂於故習貪利侵欺立即嚴參懲辦該河督務當督飭各道廳將所籌添撥減埽認真經理以期工堅帑省至前後五成官幕霜酬各節既據查明現在並無此等名目卽著毋庸置議

○欽奉

慈禧端佑康頤昭豫莊誠皇太后懿旨本年五旬萬壽慶典業經加恩近支劄貝勒等因思在

京王大臣等有勤勞素著者亦宜特沛恩施御前大臣科爾沁博多勒噶台親王伯彥訥謨祜著加恩賞坐四人肩輿軍機大臣禮親王世鐸著加恩交宗人府從優議敘伊子頭品頂戴誠厚著加恩賞給應封不入八分輔國公並挑在乾清門行走大學士管理戶部事務額勒和布著加恩賞戴花翎協辦大學士戶部尙書閻敬銘刑部尙書張之萬著加恩交部從優議敘刑部右侍郎許庚身著加恩賞給頭品頂戴領侍衛內大臣固倫額駙公景壽之子員外郎志勳著加恩以郎中補用散秩大臣固倫額駙公符珍著加恩賞挑御前行走戶部左侍郎嵩甲兵部右侍郎師曾總管內務府大臣廣順巴克坦布均著加恩交部從優議敘毓慶宮行走工部尙書翁同龢吏部右侍郎張家驤戶部右侍郎孫家鼐均著加恩各賞御書匾額一方用示宣綸錫羨至意○欽奉 慈禧端佑康頤昭豫莊誠皇太后懿旨本年五旬萬壽慶典

允宜覃敷闡澤因念推恩之序首重親親惇親王奕諱之子輔國將軍載瀾著加恩賞給二等鎮國將軍官散秩大臣載瀾載津均著加恩賞挑乾清門行走恭親王奕訢之子不入八分輔國公載潢著加恩賞食全俸醇親王奕譞著加恩賞給御書嘉猷經國匾額一方伊子不入八分輔國公載澧著加恩賞食全俸親王銜惠郡王奕祥著加恩賞食親王全俸郡王銜貝勒奕劻著加恩晉封慶郡王貝勒奕劻著加恩賞給郡王銜貝勒載漪載瀜著加恩各賞銀一千兩由內發給貝子銜鎮國公奕謨著加恩晉封貝子貝勒載澍貝子溥倫輔國公載澤鎮國將軍溥侗均著加恩在上書房讀書用示施恩錫慶篤念宗支至意

○欽奉

慈禧端佑康頤昭豫莊誠皇太后懿旨本年五旬萬壽慶典迭沛恩綸因念封疆大臣實能爲

國宣力者允宜尤加獎敘大學士直隸總督李鴻章欽差大臣大學士左宗棠兵部尚書彭玉麟忠誠蒞事保障宣勞均著加恩賞給御書匾額各一方伊犁將軍金順兵部右侍郎劉錦棠廣東陸路提督張曜慎固邊防克勤職守金順著加恩開復革職留任處分劉錦棠著加恩賞加尚書銜張曜著加恩賞巡撫銜前任陝甘總督楊岳斌奉詔治軍不遑將母著加恩賞給伊母御書匾額一方大緞二疋四川總督丁寶楨陝甘總督譚鍾麟轉餉撥兵共據忠愛前湖南提督鮑超固原提督雷正綰或奮馳邊徼或入衛京畿均著加恩交部議敘此外諸臣受國家股肱心膂之寄膺干城腹心之選務當勉竭忠悃於應辦吏治

軍務實力實心共籌康濟同建膚功渥膺懋賞○以劉錦棠爲甘肅新疆巡撫仍以欽差大臣督辦新疆事宜○調魏光燾爲甘肅新疆布政使以譚繼洵爲甘肅布政使○癸酉奎斌奏臣接管卷內光緒九年十二月初三日准刑部咨以各省軍流徒犯脫逃日衆亟宜整頓又附近近邊邊遠三項軍罪舊法參差宜加刪改均請 旨飭下各省體察情形妥議具奏等因咨行到晉升任撫臣張之洞行司遵議未據詳

辦旋卽卸事臣到任准移覆督同署按察使黃照臨悉心籌議因查晉省徒犯一項每年尙屬無多且限滿卽予釋放安插既易逃者亦鮮至軍流各犯配發來晉向均發交鄉保人等管束從前奉發較少防範易周亦尙不甚疏脫光緒七年兩次恭逢 恩詔查辦減等解晉人犯紛至沓來分撥各州縣安置多者

至數十名約束稍疏脫逃遂衆而究其犯事之由或逞其私忿或迫於飢寒以致身蹈刑章屏諸異地遠離鄉井乏術謀生羈其身而不安其心何以責其奉公守法此誠亟宜變通設法安置者部議一切令其力作令其充當夫役量予工食時加編管洵足補救時局惟各省情形不同晉省地瘠俗儉修城挑河事非恆有負糧運炭居民賴以自存且視此輩非可與伍之人孰肯僱其耦耕合依計惟由官設法安置庶或稍可羈縻查各州縣以及佐雜衙署把門巡更聽事等項夫役每署多者數十人少亦數人以及僱募鄉勇巡緝向均由官發給工食又肩挑負販亦足營生若將到配人犯除老疾者仍照例撥入養濟院發

給口糧外餘者核其原犯情節輕重分爲兩途其命盜案內犯人令其充當各項夫役鄉勇佐雜衙署亦一體撥充由官照章給發工食仍令誠實頭役及勇目管束並於印冊內聲明派充何署何役以憑稽考其雜案內人犯則發交鄉保管束由官每名酌給資本錢數千令其卽在衙前小販謀生仍於朔望按名點驗庶令各安生業不致仍前脫逃若能規復舊例將新疆遣犯照例發往不復改發則內地人犯藉可疏通尤易安插惟新疆能否安置應由新疆大臣查明辦理至充軍之法原因所犯重於流罪輕於絞候特立五軍使之充當苦差以示區別是以附近近邊邊遠三項其地雖與三流相同其罪實較三流爲重祇以裁撤邊衛改發各州縣安置而管束與流犯毫無區別遂至犯滿流者加一等擬發附近二千里充軍乃轉輕於滿流誠如部議未免輕重倒置惟查附近近邊邊遠三項乃罪名之等差若遽行刪除流罪加等者俱擬足四千里充軍不特與名例諸多牽制且亦無分重輕似非慎重刑章之道臣悉心酌議與其更變成憲致使三軍罪皆相等曷若仍維舊制量加枷號俾有區分擬請將附近近邊邊遠三項各於到配後酌加枷號三箇月而里數悉仍其舊至軍犯在配脫逃被獲加等調發仍各照本例辦理如此量爲變通庶成法不致變更而軍流亦有等差矣下刑部知之○以錢桂森爲內閣學士○命趙佑宸授載澍讀王文錦授載澤讀張仁黼授溥倫溥侗讀○甲戌諭劉錦棠譚鍾麟奏遵保各省關口後路各臺局

籌解協餉各員籲懇恩施開單呈覽一摺甘肅新疆戡定以來舉行善後事宜協撥餉項甚多各省關歷年籌解力濟邊軍不分畛域自應量予獎敘四川總督丁寶楨福州將軍穆圖善兩江總督曾國荃前安徽巡撫裕祿前江西巡撫潘霽浙江巡撫劉秉璋江蘇巡撫衛榮光前江西巡撫李文敏山東巡撫陳士杰署山西巡撫奎斌均著交部從優議敘署湖廣總督卞寶第河東河道總督成孚湖北巡撫彭祖賢河南巡撫鹿傳霖陝西巡撫邊寶泉署湖南巡撫龐際雲署安徽巡撫盧士杰均著賞加頭品頂戴其餘單開出力各員所請獎敘著該部議奏○諭吏部奏遵議處分一摺據稱前江西巡撫潘霽於己革知府董兆奎前經保薦卓異照革職公罪例議以革職等語潘霽著加恩改爲革職留任○以曾紀澤爲兵部右侍郎○以陳彝爲甘肅按察使○丁丑諭軍機大臣等李鴻章電稱張佩綸懇准回京等語張佩綸著仍遵前旨辦理船政事宜不得藉詞諉卸○曾國荃奏臣於光緒十年九月十五日欽奉電旨左宗棠奏籌議援臺一摺著照所議南洋派兵輪五艘北洋派兵輪四五艘在上海會齊赴閩援助等因欽此當卽欽遵辦理飭籌防局輪船支應所不惜重價豫備軍火與船上攻戰器具並購買外洋六角火藥及松白煤議派統帶官籌備一切需用各項嗣於九月二十九日奉電旨李鴻章現派德國水師總兵厲百齡帶快船赴閩著飭令速往停滬後與南洋所撥各船會合前進並著曾國荃楊昌濬飭水師統帶等與厲

百齡妥爲聯絡商辦或有訓練未精見識未到之處卽囑厲百齡隨時幫同教練指示等因欽此均經恭錄咨行欽遵在案查自奉 旨飭令南洋派船以來卽與北洋大臣李鴻章往返函商數次又與長江提臣李成謀隨時函商旋據覆函稱開濟南琛南瑞三號快船之外惟澄慶威靖二船可以出洋共計五船略爲厚實礮位略可及遠至於統帶之員亦惟現在總理輪船營務處提督銜總兵吳安康與各船相習較久堪勝統帶之任卽用營務處關防可以號令各船所有出洋應用軍火餉糧各件業由籌防局覓爲豫辦不令缺乏至各船應領口糧及以後買煤經費亦札令吳安康與各管駕面商酌定數目帶往應用臣接李成謀函咨比經札飭吳安康爲統帶並函囑李成謀轉飭吳安康等一俟北洋所派之船來滬卽行遵照 諭旨統率五船與李鴻章所派德國水師總兵厲百齡妥爲聯絡商辦凡有訓練未精見識未到之處隨時囑厲百齡指示務期和衷共濟一俟會齊之後約期偕發相機入閩斷不可稍執己見致誤戎機吳安康此行任大責重自願與厲百齡虛心商榷統率各管駕實心任事仰慰 宸廑報聞○曾國荃奏南洋兵輪所需煤炭向係購辦東洋可介子煤及臺灣基隆煤兩種近因派船援臺又添購西洋松白煤一種其價雖較可介基隆之煤增鉅而火力較旺輪船燒用其行較速是以酌購數千噸以備各兵輪出洋禦敵之用至平常操演行駛仍發給可介基隆兩種惟江海防務孔亟基隆之煤現已難購可介

之煤價亦日昂不得不先事豫籌訪辦內地之煤以供兵輪及機器局之用七月初間派記名道馮邦棟採辦湖南耒陽白塊煤先後運到試驗火力較遜不甚合用嗣聞江西樂平老龍坑所產之煤力量尚佳經籌防機器局道員湯壽銘孫傳樞郭道直等囑湖口鎮總兵丁義方辦到樣煤數十噸分發各兵輪試用愈云火力與可介基隆相仿其價亦甚相埒當此防務緊要之時內地有煤可用自應預爲採辦以免外洋居奇臨時不致匱乏昨已照飭丁義方卽日試辦認真揀選務須與所寄樣煤相符庶可杜絕雜細碎之弊仍飭記名道馮邦棟俟湖南辦煤經手事畢馳往湖口會同丁義方經理如果樂平老龍坑之煤以後各兵輪燒用咸宜將來卽由丁義方馮邦棟源源購辦庶幾輪煤有資實於防務多所裨益至此項煤炭乃海防應用之件自應預先奏明免完關卡稅釐以利軍儲下戶部知之○己卯諭本年十月初十日恭遇 慈禧端佑康頤昭豫莊誠皇太后五旬萬壽前經降旨吏部等部八旗都統查明京外實任大員老親候旨施恩茲據查明京外大員老親有年逾八十者承歡祿養愛日舒長洵屬昇平人瑞允宜特加賞資欽差大臣尙書銜甘肅新疆巡撫劉錦棠之祖母陳氏著賞給御書匾額一面紫檀三鑲玉如意一柄大卷江綢袍褂料二疋大卷八綵緞袍褂料二疋內閣學士兼禮部侍郎銜廣福之母徐佳氏著賞給御書匾額一面紫檀三鑲玉如意一柄小卷江綢袍褂料二件小卷八綵緞袍褂料二件西甯辦事大

臣李慎之父李宗鏡著賞給御書匾額一面紫檀三鑲玉如意一柄小卷江綢袍褂料二件小卷八絲緞袍褂料二件廣州副都統尙昌懋之母舒穆魯氏著賞給御書匾額一面紫檀三鑲玉如意一柄小卷江綢袍褂料二件小卷八絲緞袍褂料二件前工部尙書麟書之母樂鄂氏著賞給御書匾額一面紫檀三鑲玉如意一柄小卷江綢袍褂料二件大卷八絲緞袍褂料二件降調副都統清凱之母馬佳氏著賞給御書匾額一面紫檀三鑲玉如意一柄小卷江綢袍褂料二件小卷八絲緞袍褂料二件前陝甘總督楊岳斌之母向氏前已賞給匾額大緞著再加賞紫檀三鑲玉如意一柄大卷江綢袍褂料二件用示錫類推恩至意○辛巳 上詣 慈寧宮行禮○壬午諭本年恭逢 慈禧端佑康頤昭豫莊誠皇太后五旬萬壽普天同慶所有王公及京外文武官員現任議降議罰及以前有革職留任及降職罰俸之案著加恩概予寬免○諭本年恭遇 慈禧端佑康頤昭豫莊誠皇太后五旬萬壽所有來京祝嘏之直隸通永道薛福辰著加恩在任以應升之缺升用天津府知府汪守正著加恩在任以道員升用○諭軍機大臣等本日降旨寬免王公及京外文武官員降罰革留等項處分除左翼前鋒統領德福內閣學士升泰一等公德隆毋庸寬免外餘著該衙門查明辦理○諭軍機大臣等據曾紀澤電陳節略八條所擬與前次電旨之八條尙有相背如後來辨論著堅持定見勿稍游移倘有商議之處務當速電請旨不得輕率遷

就近日關外各軍疊勝並諭該侍郎知悉瓦使如固執己見曾紀澤可宣播其非○癸巳以李鴻章爲文
華殿大學士靈桂爲武英殿大學士額勒和布爲體仁閣大學士○諭本年恭遇慈禧端佑康頤昭豫
莊誠皇太后五旬萬壽普天同慶所有隨班祝嘏之革職等員及耆民等自應量予恩施前馬蘭鎮總兵
慶錫前國子監司業馬金壽前湖南城步縣知縣盛鎰源前都察院左都御史崇厚前戶部右侍郎長敘
前禮部右侍郎寶廷前盛京兵部侍郎綿宜前河南巡撫李鶴年前金州副都統毓福前金州副都統希
拉布前正黃旗滿洲副都統馬蘭鎮總兵景瑞前都察院左副都御史崇勳前總管內務府大臣文錫茂
林前記名提督張潤前署烏里雅蘇臺參贊大臣奎前奉宸苑卿慶林前頭等侍衛奉恩將軍近光前
鑲黃旗滿洲護軍參領安慶前遼陽城守尉毓良前吉林雙陽堡總管清瑞前安徽徽甯池太廣道恭鎰
前貴州糧儲道松長前署河南開歸陳許道啟續前山西冀寧道左雋前江蘇常鎮通海道高長紳前開
封府知府王文蘭前福建補用道丁嘉瑋前刑科給事中鄭溥元前吏部郎中敬裕前戶部郎中裕溥前
戶部郎中邵承瀚前刑部郎中截取知府王培增前上駟院郎中德生前禮部員外郎恩緒前宗人府副
理事官德雋前吏部主事繆冠瀛前吏部堂主事聯海前戶部候補主事崔澄寰前戶部候補主事周頌
前內務府堂主事慶裕前藍翎侍衛阿克達春前都察院經歷趙承恩前試署主事上駟院筆帖式恆廉

前筆帖式石齡前山西候補直隸州知州李春熙前廣東佛岡直隸廳同知朱兆槐前河南候補同知王麟紱前候選京府通判韓英前試署奉天蓋平縣知縣李梅林前直隸州知州青谿縣知縣賈芳前山西候補知縣胡震杞前安徽全椒縣知縣黃嘉瑞前雲南保山縣知縣鮑嘜前江蘇金山縣知縣何炳章前北城兵馬司副指揮韓士俊前東城兵馬司副指揮楊樹藩前南城兵馬司吏目呂陳善前署兵馬司吏目倪鏐前浙江補用典史高殿魁前雲南大理府知府景興前副護軍參領遇慶前副護軍參領錫樞前候選同知張鈞前山東候補知縣袁福海以上革職休致等員五品以上者均照原官降二級賞給職銜六品以下者均賞還原銜其已有職銜者均著加一級隨同叩祝之耆民等應如何賞資之處著該衙門查照成案辦理○乙酉諭潘蔚奏遵保人才一摺前署南昌府知府顏鍾驥著送部引見南昌府知府賀良楨南昌府同知冷鼎亨建昌縣知縣董沛署南城縣知縣趙之謙臨川縣知縣汪以誠均著交軍機處存記○丁亥色楞額崇綱奏查光緒七年三月十五日承准軍機大臣字寄奉 上諭恆訓丁寶楨奏請飭勘明內地與瞻對地方界址分立界碑等語欽此欽遵當卽恭錄譯行商上轉飭欽遵並委員會同川員勘勘在案嗣因川省委員候補知府楊福萃丁憂回省戍防瞻對番官四郎珥堆香因病身故日久未能辦結復經改委巴塘糧員四川候補知縣稽志文督同新派戍防瞻對番官丹巴明足爾辦理去後茲

據委員稽志文稟稱川省遴委道員丁士彬督同該員辦理戍防瞻對番官丹巴明足爾遵調前來並將
歷年交涉夷案秉公訊斷查明查畧之句結瞻番實由裏塘土司之先攻查畧裏塘土司之先攻查畧實
由於查畧之侵佔木拉石百姓因此忿爭木拉石百姓之投查畧實由於裏塘土司守備洛宗策登等之陵
虐百姓東泥麥色首先械鬪所致逐件查明分別剖斷兩造悅服並將界務分別予斷在噶壩穹壩阿壩
之北雄辣山豎立川藏界碑一座又於三壩之南裏塘之北立碑一座以示區別則三壩仍係川疆其大
道差近年已久不支百務俱廢仍飭令查照舊日章程分別應差三壩應上夷賦按年照納查畧改歸四
川屬只每年交納商上銀一百兩從此瞻對番官不得與聞查畧地方之事裏塘土司亦不得再言三壩
係是裏屬查畧首惡業已伏除餘皆充發西藏永不准再至裏塘及梭羅三材地方滋事裏臺三犯發往
鑪城分別監禁管束不准私行回裏其裏查互相搆兵所失各物亦兩相抵償清楚永無後釁曲登毛了
各土司勒令繳清歷年欠交商上之款該土司等亦結認以後仍照舊章上納界址均已劃清詳載斷碑
裏查訟案亦已完結並稱裏塘土司釀生邊衅且失察應管頭人罪無可辭惟因此案擾累頻年應請免
議取有番官土司遵依了案分劃清楚輸服切結川藏歷年交涉夷案一併結清刷印碑文呈送夷結稟
報前來奴才等竊查裏塘瞻對夷案牽涉有年倘辦理失於持平番眾卽難悅服界務亦無從舉辦今道

員丁士彬督同委員稽志文等先將歷年積案秉公斷結復將所轄部落分別劃清既可釋瞻裏之前嫌卽以全川藏之大局辦理極爲周詳實屬異常出力未敢沒其勤勞伏查道員丁士彬籌辦邊務悉合機宜惟該道已蒙 恩賞布政使銜花翎無可加獎應如何 恩施之處伏候 聖裁委辦界務同知銜知

州用四川候補知縣稽志文備歷艱辛勤勞卓著擬請 賞戴花翎二品頂戴花翎戍防瞻對番官前藏

戴琿丹巴明足爾心地明白辦事認真擬請以噶布倫儘先升用以示鼓勵之處出自 逾格鴻慈至裏

塘土司不應與兵構釁於前瞻對番官亦不應助兵圍攻於後實屬厥罪維均現據該委員稟稱因此案

擾累頻年應請一併從寬免究以釋仇怨而息紛爭得 旨覽奏已悉丁士彬著交部議敘稽志文等著

照所請獎勵該部知道○戊子諭軍機大臣等據劉銘傳電奏臺灣勸捐軍餉官紳皆請奏開實官捐輸

等語著戶部議奏○以黃河南堤漫口合龍予在工出力人員許鈴身等獎敘有差○己丑准故提督吳

長慶在浙江嘉興府建祠○浙江巡撫劉秉璋奏准刑部咨具奏各省軍流徒犯脫逃日衆亟宜變通整

頓並附近近邊邊遠三項充軍沿襲虛名徒滋煩雜應如何量加刪減明示區別各摺片請 旨飭下各

省體察情形議奏等因咨行到浙經 臣行司分飭各屬查議去後茲據按察使孫翼謀具詳前來 臣查軍

流徒犯定例專管有官主守有役發給口糧派充夫役立法本已周詳而脫逃仍所不免此固由防範之

不嚴亦由若輩狡黠游惰習與性成兼之犯多事少無計謀生收管員役既不能計口授食又不能形影相隨偶一疏防恆易颺逸於此而求整頓之方惟有籌彼生計嚴加約束兩端第葺室棲流無此經長之款城河濬築亦非常有之工此外開山墾地駕船挑脚一切力作之事民間各有專業更多窒礙未可垂爲定章悉心體察似宜遵照向例量加變通較爲簡當易行擬於到配軍流等犯除挾有家口資財自能營生者不計外其年老殘疾之人歸入養濟院按名發給例支孤貧口糧俾免失所少壯貧苦又無手藝各犯照例發給一年口糧卽在配所文武各衙門一體分撥收管察其所長令充巡更打掃夫役日給工食並遴派頭役目兵爲之主守勤加編管督率操作不許遠離衙署如有不服約束怙惡從事者卽報明地方官從重懲治遇有脫逃州縣收管者以州縣爲專管佐雜營汛收管者以州縣爲兼轄佐雜營汛爲專管照例揭參議處本省拘役徒犯亦可照行如此量予變通庶各犯生計較寬易於馴制各衙署分管犯數無多防範不難嚴密脫逃或可漸少矣至五軍各犯自裁撤軍衛以後向與流犯一律安置並無輕重之分而附近近邊邊遠三項道里實較滿流爲近部議將此三項充軍均改滿流加等極邊似屬可行當此新疆開設郡縣招人墾荒之時若將從前改發內地各犯仍發新疆分別種地當差尤屬因地因時良策應由新疆各大臣體察情形奏明辦理下刑部知之○壬辰諭軍機大臣等內閣學士周德潤奏官

軍進取越南宜以正兵牽制河內之師別用奇兵由車里趨老撾直走哀牢以暗襲順化俟抵哀牢後兵分三路扼據險要足以制勝募用滇邊土人必能得力等語著岑毓英詳察地勢悉心酌度所奏如果可行卽行相機籌辦惟懸軍深入宜策萬全務當穩慎圖維以操勝算毋得稍形輕率致誤事機原片著鈔給閱看○命崇綺廖壽恆前往江西查辦事件○轉汪鳴鑾爲翰林院侍讀學士以惲彥彬爲翰林院侍講學士○癸巳諭軍機大臣等都察院奏湖北舉人劉斌等遣抱以官吏侵蝕書院田租等詞呈訴著卞寶第彭祖賢查明辦理原呈均著鈔給閱看將此各諭令知之○甲午諭彭玉麟等奏調員差委等語候選道王葆辰同文館教習熊方伯貴州候補知縣王秉恩著總理各國事務衙門及福建貴州各督撫飭令前赴廣東交彭玉麟等差遣委用○諭軍機大臣等據御史何崇光奏稱省城開設闖姓廠視澳門開廠流弊尤甚請飭申明厲禁等語著張之洞倪文蔚歸入潘仕釗前奏熟權利害一併妥議具奏另片奏請將闖姓賭匪陳恆等嚴拿懲治並著查明究辦○命徐會灃授溥倫讀○乙未李鴻章電致總理各國事務衙門頃接旅順丁汝昌等續電二十二泰安船自朝來得吳兆有袁世凱函云十七盜刺閔泳翊未死吳等分投彈壓十八兵遷朝王於他處殺大臣尹泰駿等六人相臣去柄外署皆換日黨吳等欲入宮朝人傳王命力阻日人卽擁王回宮各公使勸我兵勿動吳等稟懇調重臣東渡又茅延年十九酉刻發